

Nuwe Lied Bediening

En Hy het 'n nuwe lied in my mond gegee, 'n lofsang tot eer van onse Elohiem (Ps. 40:4)

E-pos: kontak@nuwelied.info
Webwerf: <http://www.nuwelied.info>

Yeshua is die Boom van die Lewe. Wanneer ons die Torah bestudeer moet ons onthou dat Yeshua Messias die Lewende Torah is – die Woord van YHVH wat vlees geword het. Hy is die weg na die waarheid wat lewe gee – die Lewende Manna wat uit die hemel gestuur is. Sonder Yeshua wat deur die Afgesonderde Gees in ons, en deur ons lewe, sal die geskrewe Torah net die dooie letter van die wet wees!!

Yeshua is die hart van die Vader!

Parashah 48: Shoftim – Regters.

Jy moet regters en amptenare aanstel in al jou dorpe wat יהוה' jou God, jou gee volgens jou stamme en hulle moet die volk oordeel volgens 'n regverdig oordeel. Deut. 16:18 – PWL¹

Torah : Deut. 16:18 tot 21:9.

Haftorah: Jes. 51:12 tot 52:12.

Nuwe Verbond: Matt. 18:15 tot 20; Joh. 8:17; Hand. 14:23; 1 Kor. 5:9 tot 13; 1 Kor. 6:1 tot 8; 2 Kor. 13:1; Titus 1:5; Ef. 2:22; 4:11; Heb. 10:28 tot 31.

Hierdie notas is aanvullend tot die vorige notas vir Parashah 48 wat afgelaai kan word by: [Parashah48Notas.14](#) en [Parashah48Notas15](#) en [Parashah48notas16](#).

Christ said, "My sheep hear My voice." If we will attend to the voice of the Spirit of Christ within us, and yield ourselves to go where He leads and accept the life He chooses for us, Yahshua assures us that at the end of the journey we will be mature sons who manifest His life and character. There is no substitute for a Spirit directed life. Not even a life devoted to the Law and to an embrace of Hebrew roots can serve as a substitute for a Spirit directed life. Indeed, when one embraces the Law as their guide, the Law becomes an impediment, hindering the believer from looking to the Spirit of Christ as their guide – Joseph Herrin.

Beware of false knowledge; it is more dangerous than ignorance – George Bernard Shaw

¹ Alle teksverwysings is geneem uit PWL (Pad van Waarheid tot die Lewe) Vertaling (www.padwlewe.ch), behalwe waar anders vermeld. Om 'n kopie van die Bybel te bekom kan Gerrie Coetzee per e-pos by padwlewe@yahoo.com gekontak word of telefonies by 074 361 2134.

I have more respect for the devil than for some preachers I have met, because the devil believes the Bible is the Word of God! – Billy Sunday.

God's Torah is a thing of beauty, because it's an expression of who He is – Izzy Avram.

Torah Bespreking

Hersiening

Om YHVH se Woord te hoor (*sh'ma*), te bewaar (*sh'mar*) en te doen (*asah*), is om die regte keuses te maak, naamlik om 'n lewe in Yeshua deur die onverdiende guns van YHVH ons God en Vader te kies en om te kies om YHVH se Torah soos dit in die nuwe verbond vervul is nougeset gehoorsaam te wees.

Ons moet verstaan dat wanneer YHVH-God ons die keuse gee tussen die seën (lewe) en die vloek (dood) (Deut. 11:26 tot 28), verwys Hy eerstens na die keuse van geestelike lewe! Alleenlik wanneer ons die keuse maak van die geestelike lewe van wedergeboorte deur vertrouwe in Yeshua as die gekruisigde en opgestane Messias, en waar dit gepaardgaan met gehoorsaamheid aan YHVH se Torah soos dit in Yeshua vervul is, en soos dit in die nuwe verbond uiteengesit word, sal dit in die fisiese realm manifesteer as oorvloed lewe van siel en liggaam.

In hierdie week se Torahstudie leer ons van YHVH se regeringstruutuur soos dit in die Torah van Moses vervat is. 'n Regeringstruutuur vir 'n ordelike en voorspoedige samelewing waar YHVH in hulle midde sou kon woon!

Vir sowat 40 jaar het Israel as 'n eenheid in die wildernis saam geleef, maar in die land Kanaän sou hulle as stamme elkeen op sy eie grondgebied gaan woon. Daarom was dit noodsaaklik dat YHVH 'n regeringstruutuur in plek moes stel sodat oor elke stam en oor elke individu afsonderlik volgens Torah-beginsels regverdig geregeer kon word. Deur YHVH se regeringstruutuur sou Israel steeds as eenheid volgens die Torah van Moses funksioneer. Hulle sou een in Torah wees, hoewel nie eenders nie. Die tabernakel, en uiteindelik die tempel, sou steeds die middelpunt van Israel se geloofslawe, sowel as hul gemeenskapslawe wees.

In parashah *Shoftim*, verduidelik Moses die beginsels van die oppergesag, naamlik van die gesagstruutuur wat Israel moes regeer. Hierdie gesagstruutuur moes uit regters (*shoftim*) en opsigters (amptenare; *shotrim*) in die poorte (stede) van elke stam bestaan. Die regters was diegene wat Torah moes ken om dit korrek te kan verklaar en te kan toepas sodat onpartydige uitspraak in sake gelewer kon word. Die opsigters (amptenare) moes toesien dat die beslisinge (uitsprake) van die regters uitgevoer word.

YHVH se regeringstruutuur het dus uit gekose leiers bestaan wat die volk moes dien deur toe te sien dat geregtigheid geskied en orde gehandhaaf word volgens die standarde en riglyne soos in die Torah van Moses uiteengesit word.

Maar 'n baie belangrike vraag is of hierdie regeringstruutuur volgens die Torah van Moses nog steeds in die nuwe verbond van toepassing is?! Het daar dus 'n verandering in die wet na Yeshua se folterdood en opstanding gekom? Die antwoord is "ja"! Wat dit behels sal bespreek word.

Hoewel ek hierdie vraag ook in vorige notas bespreek het, is dit so 'n uiters belangrike vraag dat ek dit weer gaan herhaal. Ek doen dit in die lig daarvan dat so baie gelowiges in die Messiaanse Beweging verblind is vir die verandering in die Torah van Moses wat plaasgevind het na die die folterdood en opstanding van Yeshua. Dit ten spyte van wat die Apostoliese Skrifte van die nuwe verbond ons leer!

Bepeins of Bespreek

1. Wanneer ons die Torah, die eerste vyf boeke, en die Skrifte in geheel bestudeer, moet ons altyd onthou dat Yeshua Messias die fokus van Torahstudie moet wees. Ons kan soveel klem op die Torah van Moses lê dat ons Yeshua van Torah mis, asook die feit dat Yeshua die einddoel van die Torah van Moses is (Rom. 10:4). Dan kan dit gebeur dat ons vreugde en dankbaarheid in die genade van sondevergifnis in Yeshua verdwyn.
2. *A huge error of Torah obedience is when we exalt our sacrifices of obedience over love and compassion.* Verwys Matt. 22:34 tot 40.

YHVH se Regeringstruktuur

Dit is YHVH se wil dat Sy volk 'n regeringstruktuur in plek moet hê wat volgens Torah sal verseker dat alles welvoeglik en ordelik in die gemeente (samelewing) sal geskied. Hierdie regeringstruktuur moet volgens die beginsels van 'n teokrasie funksioneer. Dit beteken dat YHVH-God die Oppergesag en die Wetgewer is wat alles aan Yeshua Die Gesalfde Een gedelegeer het. Elke gelowige in Yeshua as die Gesalfde Een van God, staan dus onder die direkte gesag van Yeshua as die hoof van die Vader se huishouding.

Yeshua is ons Koning en ons Hoofpriester en Hy is vir ewig deur YHVH aangestel in 'n huidige Hemelse Koninkryk wat aan die einde van die eeue op aarde gevestig sal word! Huidig regeer Yeshua as Koning in ons harte – deur ons denke, wil en dade – maar eendag sal Hy ook vanuit die nuwe Jerusalem oor die ganse aarde en mensdom heers.

Yeshua is ons Hoofpriester wat nie 'n fisiese aardse tempel benodig nie, want elke volgeling is 'n tempel waar Yeshua deur die Afgesonderde Gees in ons woon. Ons is as individue, en gesamentlik as gemeente, is Yeshua se tempel.

Watter ooreenkoms het die tempel van God met demone? Julle is die tempel van die lewende God, net soos gesê is: “Ek sal in hulle bly en Ek sal in hulle leef en Ek sal hulle God wees en hulle sal vir My 'n volk wees. 2 Kor. 6:16.

Maar aan die einde van die eeue sal YHVH-God en Yeshua in die nuwe Jerusalem die tempel wees (Open. 21:22).

Die Torah van Moses ten opsigte van 'n mens as koning en 'n mens as hoofpriester is dus uitgedien en daarmee saam het die noodsaaklikheid vir 'n tempel met 'n Levitiese priesterorde, asook die offerandes wat daarmee saamgaan, tot 'n einde gekom.

11 maar Die Gesalfde Een, wat gekom het, het die Hoofpriester geword van die goeie dinge wat Hy gedoen het en Hy het die groot en volmaakte Tabernakel binnegegaan, wat nie met hande gemaak is nie en nie van hierdie geskepte dinge is nie. *12* Hy het ook nie ingegaan met die bloed van jaaroues bokke en kalwers nie, maar met Sy eie bloed het Hy een maal in die plek van Afgesonderdheid ingegaan en ewige loskoping verkry, Heb. 9:11 en 12.

Opsommend sien ons as deel van die nuwe verbond dus reeds die volgende veranderinge aan die Torah van Moses:

- Eerstens, en baie belangrik, Yeshua is ons Ewige Koning (Matt. 2:2 en 6; Miga 5:1). Daar sal nie weer 'n mens as koning oor die hele huis van Israel regeer nie!
- Tweedens is Yeshua ook Ewige Profeet wat uit die midde van Israel opgewek is. Hiervan het Moses getuig (Deut. 18:15 tot 19) en in die nuwe verbond word dit bevestig (Joh. 4:19 en Joh. 6:14)
- Derdens is Yeshua ons Ewige Hoofpriester volgens die orde van Melgisédék. Geen mens uit die nageslag van Aäron sal volgens die Levitiese priesterorde weer as hoofpriester aangestel word nie. Die Levitiese priesterorde is met die Melgisédék priesterorde vervang! Tesame hiermee is alle offerandes volgens die Torah van Moses uitgedien en is 'n tempel dus nie meer nodig nie! Die skrywer van die brief aan die Hebreërs bevestig hierdie verandering aan die Torah van Moses:

11 As daar dus volledige afhandeling deur die Levitiese priesterskap was, waardeur die geskrewe wet vir die mense vasgestel is, waarom was dit nog nodig dat 'n ander nie-Levitiese priester moes opstaan, volgens die beeld van Malki-Tzedek? Sê dit dat Hy volgens die beeld van Aharon sal wees? 12 Net soos daar 'n verandering in die priesterskap gekom het, net so was daar 'n verandering in die reëls, 13 want Hy van Wie hierdie dinge gesê word, behoort aan 'n ander stam, waaruit niemand nog ooit by die altaar bedien het nie, 14 want dit is bekend dat ons Meester vanuit Y'hudah opgegroeï het; 'n stam waarvan Moshe niks aangaande die priesterskap gesê het nie. 15 Nog baie duideliker is dit: dat hy sê dat 'n ander nie-Levitiese Priester volgens die beeld van Malki-Tzedek opstaan. 16 Hy wat dit nie was volgens die wet van opdragte, na die liggaamlike, nie, maar deur die krag van lewe wat nie vernietig word nie, 17 want Hy getuig aangaande Hom: "U is nie-Levitiese Priester vir ewig volgens die beeld van Malki-Tzedek," 18 want daar was eers 'n verandering aan die orde weens die onvermoë daarvan en dat daar geen voordeel in was nie, 19 want die geskrewe wet het niks tot sy einddoel gebring nie, maar 'n versekerde verwagting het in sy plek ingekom, waarin ons tot God nader, wat beter is as dit. Heb. 7:11 tot 19

Moses as leier ("koning") van Israel en as profeet was slegs 'n heenwysing – 'n skadubeeld – van Yeshua. So ook was Aäron as hoofpriester slegs 'n heenwysing na Yeshua as Ewige Hoofpriester.

Ons moet onthou dat die Torah van Moses het Israel net in bewaring gehou tot die Gemanifesteerde Teenwoordigheid van Yeshua sou kom, naamlik die Torah van Yeshua van die nuwe verbond wat groter is as die Torah van Moses. (Gal. 3:24 en 25; 2 Kor. 3:7 tot 11). Die eer, lof en grootheid van die geskrewe wet, naamlik die Torah van Moses, het vergaan en is vervang met die alles oortreffende eer, lof en grootheid van die Torah van Yeshua van die nuwe verbond!!

Daarom sê die skrywer van die brief aan die Hebreërs:

Deurdat Hy sê 'nuwe,' het Hy die eerste as oud verklaar en dit wat verouderd en oud is, is naby vernietiging. Heb. 8:13.

Met die vernietiging van die tweede tempel in 70 nM het die ou bedeling dus vir ewig tot 'n einde gekom.

Nou is Yeshua as Koning, Profeet en Hoofpriester die "uitvoerende gesag" van YHVH se Koninkryk van die nuwe verbond, want die wet van die Gees van Lewe, wat in Yeshua Die Gesalfde Een is, het ons vrygemaak van die wet van die sonde en die dood (Rom. 8:2).

Maar hoe lyk die regeringstruktuur wat aan Yeshua as die “uitvoerende gesag” van YHVH verantwoord? Hoe verskil dit van die Torah van Moses?

Wanneer die apostel Petrus ons herinner dat ons ‘n gekose nasie is wat as priesters in die Koninkryk dien (1 Pet. 2:9) dan is dit met verwysing na die Koninkryk van Yeshua en die Melgisédék priesterorde.

9Julle is 'n gekose nasie, om te dien as priesters in die Koninkryk, 'n afgesonderde volk, bymekaargemaak en bevry, om die lofprysing van Hom, wat julle uit die duisternis geroep het, te verkondig tot Sy wonderlike lig, 10julle wat vroeër geen volk was nie, maar nou die volk van God is; vir wie niemand omgee het nie, maar nou word omgee oor julle uitgestort.
1 Pet 2:9 en 10.

Die Levitiese priesterorde het hulself ‘gediskwalifiseer’ toe hulle Yeshua as Messias verwerp het. Op die wyse is die profesie in Ps. 118:22 en 23 vervul soos Yeshua dit ook bevestig het:

Yeshua sê vir hulle: “Het julle nooit in die Skrifte gelees nie: ‘Die Steen wat die bouers verwerp het, dit het die Hoof Hoeksteen geword. Hy het van die Teenwoordigheid van יהוה gekom en is wonderbaar in ons oë?’ Deur dit sê Ek vir julle: ‘Die Koninkryk van God sal van julle weggevat word en aan 'n volk gegee word wat vrugte sal dra en wie ook al op hierdie Steen val, sal stukkend breek en elkeen op wie Hy val, dié sal tot poeier gemaal word’. Matt. 21:42 tot 44.

As gevolg hiervan het Rabbynse Judaïsme vandag geen tempel nie, want Yeshua Messias het die Hoeksteen geword van ‘n lewende geestelike tempel!

Julle is daarom nie meer vreemdelinge en besoekers nie, maar inwoners van die Stad van die Afgesonderde Een en kinders van die familie van God. Julle word opgebou op die fondasie van die afgevaardigdes en die profete, met Yeshua, Die Gesalfde Een, self die Hoeksteen van die gebou. In Hom word die hele gebou aanmekaar gesit en dit groei tot 'n afgesonderde tempel in eenheid met יהוה terwyl julle ook vir Hom gebou word tot 'n blyplek van God in die Gees. Ef. 2:19 tot 22.

Ons is die priesters volgens die orde van Melgisédék wat in hierdie lewende geestelik tempel dien onder die Karakter en Outoriteit van Yeshua as ons Ewige Hoofpriester.

Yeshua is die lewende steen wat deur die mense (Rabbynse Judaïsme) wel verwerp is, maar by God uitverkore en kosbaar is (1 Pet. 2:4). Daarom laat ons ons ook soos lewende stene opbou, tot ‘n geestelike huis, ‘n afgesonderde priesterdom, om geestelike offers te bring wat aan God welgevallig is deur Yeshua Die Gesalfde Een (1 Pet. 2:5).

Aangesien daar altyd ‘n priesterorde diens moet doen in YHVH se Koninkryk, en omrede die Melgisédék orde nie ‘n fisiese tempel het nie, en ook nie die offers van die ou verbond bring nie, was dit noodsaaklik dat daar ‘n verandering in die wet moes kom (Heb. 7:12).

Hierdie verandering in Torah is nie ‘n probleem nie, want hierdie Melgisédék priesterorde is deel van YHVH se Torah. Daarom is die Torah in wese nie verander nie! Daar is steeds ‘n priesterdom.

Aangesien die onderrig en instruksies vir die priesterorde van Melgisédék verskil van die van die Levitiese orde, moet ons vra: Wat is die onderrig en instruksies (Torah) vir die Melgisédék orde?

Eerstens het ons in Efes. 2:20 gelees dat YHVH se Koninkryk van die nuwe verbond gebou word op die fondasie van die afgevaardigdes (apostels) en die profete, met Yeshua, Die Gesalfde Een, self die Hoeksteen van die gebou (Koninkryk).

Tweedens moet ons verstaan dat die dissipels (die studentevolgelinge) van Yeshua 'n verenigde priesterorde moet vorm om die Hemelse Koninkryk van YHVH te verkondig en te vestig volgens die opdrag in Matt. 28:19 en 20.

Met bogenoemde in gedagte gee Efes. 4:11 tot 16 vir ons insae in die Torah vir die priesters (dissipels) van die Melgisedekorde.

11En Hy het sommige as afgevaardigdes, sommige as profete, sommige as boodskappers van die goeie boodskap en sommige as herders en sommige as leermeesters gegee, 12om die afgesonderdes volledig te maak vir hulle dade in die bediening tot opbouing van die liggaam van Die Gesalfde Een 13totdat ons almal een sal wees in vertroue en in kennis van die Seun van God, een man, tot die mate van die volgroeidheid van Die Gesalfde Een. 14Ons sal ook nie meer kinders wees wat geskud word en gepla word deur elke wind van lering nie; deur die bedrog van mense, wat deur slinksheid beplan om te mislei nie, 15maar ons is standvastig in liefde sodat alles waarmee ons besig is, mag vermeerder in Die Gesalfde Een, wat die Hoof is 16en vanuit Hom is die hele liggaam inmeekaargepas en een gemaak by elke ligament, volgens die gawe wat elke ledemaat na mate ontvang het, vir die groei van Sy liggaam sodat Sy gebou in liefde voltooi kan word.

Volgens vers 11 is dit duidelik dat YHVH self hierdie verandering aan die Torah van Moses aangebring het, naamlik die vyf bedieninge *om die afgesonderdes volledig te maak vir hulle dade in die bediening tot opbouing van die liggaam van Die Gesalfde Een totdat ons almal een sal wees in vertroue en in kennis van die Seun van God, een man, tot die mate van die volgroeidheid van Die Gesalfde Een.*

Die Vyfvoud Bediening (Efes. 4:11 tot 14) is YHVH se regeringstruktuur van die nuwe verbond en die Gawes van die Afgesonderde Gees is die wyse wat die dissipels as priesters in die orde van Melgisédek bemagtig word (1 Kor. 12:7 tot 11).

7maar aan elke persoon word die manifestasie van die Gees gegee soos dit hom help. 8Daar word aan hom, deur die Gees, 'n boodskap van wysheid gegee, maar aan 'n ander 'n boodskap van kennis, in hom, deur die Gees; 9aan 'n ander vertroue in hom deur die Gees, aan 'n ander die gawe van gesondmaking in hom deur die Gees, 10 maar aan 'n ander wonderwerke, aan 'n ander profesie, aan 'n ander onderskeiding van geeste, aan 'n ander verskillende tale en aan 'n ander die vertaling van tale. 11Al hierdie dinge doen die een Gees en deel uit aan elkeen soos Hy wil.

Die priesters (dissipels) van die Melgisédekorde het dus verskillende bedieninge. Daar is afgevaardigdes (apostels), profete, boodskappers van die goeie boodskap (evangeliste), herders en leermeesters (leraars). Elkeen word bemagtig vir dienswerk deur ondermeer die gawes van die Afgesonderde Gees.

Die een is egter nie belangriker as die ander nie en hulle moet mekaar voorgegaan in eer betoon. Maar daar was wel 'n apostel wat die leier was soos ons sien in Hand. 15:1 tot 22, veral verse 13 en 22; asook Hand. 21:8 waar ons sien dat Jakobus erken was as die leier. Onthou: Volgens Torah is 'n leier egter iemand wat ander dien, want Yeshua het gekom om te dien en nie gedien te word nie (Matt. 20:28).

Kortliks is die taakomsywing van die vyfvoud bediening soos volg:

- Afgevaardigdes (apostels) is die leiers en hulle taak is om te organiseer en te koördineer, asook om uitspraak te lewer (beslissing te maak) aangaande Torah. Hulle moet deeglik in Torah onderrig wees en die stem van YHVH duidelik kan hoor! Apostels kan vergelyk word met die regters (die *shoftim*) soos YHVH Moses beveel het om aan te stel (Deut.

16:18). Die apostels moet onderling aan mekaar onderdanig wees. Die opsigters (*shotrim*) volgens Deut. 16:18 kan ook vergelyk word met die ouderlinge.

- Profete gee ondersteuning aan die apostels, maar waarsku, tugtig en bemoedig ook. Hulle moet die stem van YHVH duidelik kan 'hoor' en ook die stem van YHVH wees. Profete kan beskou word as die 'kwaliteitskontrole'-bediening wat alles volgens YHVH se skietlood meet. Daarom is Profete en Apostels dikwels nie baie gewild nie, want deel van hulle taak is om te waarsku en te tugtig en om orde en dissipline te handhaaf.
- Boodskappers van die goeie boodskap (evangeliste) "werf" nuwe volgelingen. Hulle is die 'mondstuk' of sendelinge van die gemeente wat die goeie nuus van die evangelie verkondig. Hulle is die 'mediese korps' wat hulp verleen aan die geestelike verwondes.
- Herders (Pastore) is verantwoordelik vir die versorging van die gemeente (Grieks: *ekklesia*; Aramees: *adat*; Hebreeus: *kahal / kehillat*), naamlik van die wat uitgeroep en afgesonder is deur YHVH en op gereelde basis bymekaar kom en saam as eenheid funksioneer. Hulle ontvang die nuwelinge wat deur die evangeliste na die gemeente gebring word. Herders, met hulle eggenote, is die geestelike ouers van die gemeente wat elkeen 'opvoed' tot geestelike volwassenheid.
- Leraars is verantwoordelik om nuwelinge, asook die gemeente te leer. Hy is die herder se hulp om die gemeente in die waarheid te onderrig, dwaling te bestry, verkeerdhede reg te stel en die regte lewenswyse te kweek sodat elkeen volkome toegerus kan wees vir elke goeie daad in die diens van YHVH kan staan (2 Tim. 3:16 en 17).

Opgesom:

Bediening	Taak
Apostel	Leierskap; Rigting; Orde, Dissipline
Profeet	Ondersteunend, waarsku; tugtig.
Evangelis	'Wurf' nuwe volgelingen; sendeling
Herder	Geestelike ouers; versorging
Leraar	Dra kennis oor

Die Skrifte van die nuwe verbond, veral Handelingen, is die bewys dat die apostels as eenheid (eendragtig) in die evangeliebediening van Yeshua gefunksioneer het. Die wyse wat hulle georganiseer was en gefunksioneer het, was die mees effektiewe wyse om Yeshua se opdrag in Matt. 28:19 en 20 suksesvol uit te voer, naamlik om dissipels van alle nasies te maak en om hulle te leer om alles te onderhou wat Yeshua beveel het.

Ouderlinge en Diakens


Gedurende die eerste eeu was die hoof van 'n sinagoge meestal 'n Rabbi. So het dit dan gebeur dat so 'n hoof van 'n sinagoge saam met die gemeente tot vertroue in Yeshua Messias gekom het.

En Crispus, die hoof van die sinagoge (bymeekaarkomplek), het met sy hele huisgesin in ons Meester geglo; en ook baie van die Korinthiërs het, toe hulle hom hoor, gelowig geword en is gedoop. Hand. 18:8.

In dorpe waar dit nie gebeur het nie, het die apostels dan 'n gemeente gestig ('geplant') onder die beheer en toesig van 'n raad van ouderlinge. Die Hebreeus vir ouderling is *zakan* en die letterlike betekenis van die woord is: *bebaarde man*. 'n *Zakan* se funksie was veelvoudig,

maar sy fokus was om die gemeente na die beste van sy vermoë geestelik en fisies te versorg en om toe te sien dat die vyfvoud bediening en die gawes van die Afgesonderde Gees ordelik sal funksioneer (1 Kor. 14:40). Vir die doel is hy bygestaan deur diakens. Ouderlinge het dus ook die rol vervul van regters (*shoftim*) en diakens ook die rol van opsigers (*shotrim*).

Die Torahregering en wyse van funksionering van die priesterorde van Melgisedek en van die gemeentes van die nuwe verbond kan skematies soos volg verduidelik word.



*Ouderlinge en diakens moet gesien word as die leiers en organiseerders, maar funksioneer ook as deel van die vyfvoud bediening en die gawes van die Afgesonderde Gees. Dit is nie 'n geval van die gemeente wat aan die ouderlinge en diakens moet verantwoord nie. Die gemeente (liggaam) bestaan uit baie lede en almal moet in eenheid saam funksioneer. Nie een is belangriker as die ander nie en almal moet mekaar voorgaan in eer betoning (Rom. 12:10). Almal is lewende stene en bou saam aan die huis van YHVH tot stigting van almal.

Bepins of Bespreek

1. In die lig van YHVH se regeringstruktuur volgens die nuwe verbond kan tereg die vraag gevra word: Kan daar hoegenaamd nog enige twyfel wees dat die Torah van Moses verander het en dat dit vervang is met die Torah van Yeshua van die nuwe verbond? Beide is die Torah van YHVH, maar die toepassing van die Torah van Moses het verander! Het die gemeente van Handeling, en al die gemeentes wat deur die apostels geplant was, gefunksioneer volgens die Torahregering van Moses of die Torahregering van die nuwe verbond?
2. Is die vyfvoud bediening en die gawes van die Afgesonderde Gees deel van die gemeentes van die Messiaanse Beweging? Hoekom is daar so min lering hieroor uit die geleedere van die Messiaanse Beweging?
3. Deur vertroue in Yeshua as die Messias is ons die nageslag van Abraham en deel van die ware Israel. As Israel (verenig en eensgesind) kan ons net een Koning en een Hoofpriester hê en kan daar net een priesterdom wees! Maar Rabbyne Judaïsme erken

nie Yeshua as Koning en Hoofpriester nie! Dit beteken dat indien die derde tempel gebou word, gaan daar twee hoofpriesters en twee priesterdomme wees! Aan watter hoofpriester gaan jy onderdanig wees?

4. Ten opsigte van die laaste 40 jaar (ongeveer vanaf die begin van Yeshua se bediening) tot die vernietiging van die tempel is die volgende in die Babiloniese Talmud geskrywe: *"Our Rabbis taught: during the last forty years before the destruction of the Temple, the lot for the Lord (on Yom Kippur) did not come up in the right hand; nor did the crimson-colored strap become white (on the neck of the scapegoat); nor did the western-most light shine; and the doors of the Hekal (Temple) would open by themselves."* [Babylonian Talmud, Yoma, 39b]. Hierdie is tog duidelike bevestiging dat Yeshua die begin is van die priesterorde volgens Melgisédek en dat Yeshua die versoening ('Yom Kippur') is.

-0-0-0-0-0-0-0-0-

Ontvang YHVH se Woord met welwillendheid, maar ondersoek self die Skrifte of hierdie dinge die waarheid is (Hand. 17:11).

Shabbat Shalom.

Johan.

Epos: kontak@nuwelied.info

Webwerf: <http://www.nuwelied.info>

Kopieë mag gemaak en gratis versprei word, maar mag nie verkoop word nie. Geen veranderinge mag aan die oorspronklike teks aangebring word en dit dan onder die naam van Nuwe Lied Bediening versprei nie.